



冰蓮集卷四

大空居士夏樹芳撰

四家語錄歌奉懷幽谷禪師兼贈知

幻有敏

四家語錄者天童雪竇投子丹霞四禪師  
錄古公案而述之者也辛丑冬泊舟順湖  
橋下訪曇如上人座有幽谷禪師自河南



行脚頗諳宗門大事予窺案頭有語錄在  
馬叩之則微笑不語再叩則再笑不語是  
晚寒氣甚烈冰堅不克解維詰朝請見曰  
此未易以知見入也以知見入則轉解轉  
縛密諦之謂何乃畧舉數則權示機緣大  
都欲吐未吐若悟若迷終不向文字落窠  
臼添註脚也因予乞法甚虔期以數日至

江門至則予以行役阻鄉干風馬牛不相  
及矣又數日復有知幻禪師自南嶽來遊  
南嶽故多高僧予復以語錄相證知幻則  
絕口不言如桃李卽下一轉語了不可得  
豈信衣夜半始付盧能且有待而然者耶  
抑知者不言言者不知如雪子之目擊道  
存無煩擬議者耶遂瀋筆次第聊寄曠懷

第恐一言涉趣不免墮百丈野狐禪耳

達摩老祖何奇哉飄然一葦浮江來五千  
文字盡埽棄面壁無語轟如雷單機直下  
超象外少林自此傳衣帶如珠走盤盤走  
珠到手拈來總三昧青州布衫信可夸廬  
陵米價稱當家庭前栢子西來意更有南  
山鼈鼻蛇若向語言尋意謂鼠啣枯藤了

無味饒爾如簧鼓舌端本地風光終贖贖  
禪機操縱在轉圜不無不有不中間當空  
迸出琉璃色始是無餘大涅槃生歿關頭  
要斬截由來妙用忘言說箇中消息識者  
誰多在巖頭與風穴君不見德山丈下祇  
留棒臨濟當年但餘喝興來三匝繞禪牀  
一段神光真透脫此時及第悟心空赫赫

金輪海底紅無邊師子一聲吼肯向人間  
效蠛蠓吁嗟乎少林已往今不復業識茫  
茫轉雙轂何年復有渡江人坐看陽春滿  
幽谷

翠峯和尚圓寂歌

有敘

予與翠峯相叅二十年所晨昏刻漏梵唄  
不虛然此僧弱骨而柔顏數爲外道闡提

所窘則數數下山不勝胸縮今年秋七月  
一旦示疾陡然遷化予竊愍之聊布數語  
以資涅槃

毘山山下能仁寺有二沙彌演法事前有  
三空後翠峯左提右挈曇花宗白楊蕭瑟  
秋風起三空雖存翠峯歿生旦莫詎足  
悲鼠肝蟲臂徒爾爲從今休去更歇去始

信觸目皆菩提不見水流元到海月落天  
邊終不改君今隻履復何歸振鐸空中竟  
誰在已矣哉歸去來長江萬里臨高臺坐  
見曩牒天眼開東家作驢西作馬此去從  
君恣瀟灑

離塵和尚飯僧募緣歌

并敘

和尚名弘琚產濠梁城下童真出家瀟然

物外蓮花不染圓光照人自吳越楚蜀之  
間普賢觀自在諸大菩薩賢聖僧靡不叅  
謁茲願飯僧十萬八千欲乞予言以佐法  
喜頭陀法潭與予善到門急欲捉筆遂書  
伽陀數語投之鉢中

有僧有僧來鳳陽五歲學佛依空王只今  
六十又三載到處普度成津梁東游禹穴

泛滄海西抵劍閣窺瞿塘飄飄雲水本無  
住一生野散真顏唐悲智觸發起弘誓欲  
啓禪悅開慈航毘耶香積功難量一粒含  
裹該十方十萬八千苾芻子食者踴躍歸  
清涼我願檀那散寶裝捨貪破悵成吉祥  
法斛所轉甘露下一一毛孔發妙香飯僧  
事畢功已就請君折葦浮大江普爲衆生

說無常雨花亂落天蒼茫佇看點石君山

旁

秀和尚血書華嚴經歌

指尖滴下娘生血片片靈文出娑竭普光  
殿上舊拈來白雀菴前今再揭衆生指頭  
各抱痛上人心行猛於鐵消消灑就作險  
糜葦囊一擲真同蛻藤枯樹倒見陽春返

本還元會真訣君不見月去寒潭光尚在  
鳥散長空空不滅又不見那吒析骨覺塗  
開天龍斷指真如徹若人了向箇中求此  
經亦是眼中屑折筋能翻大海水白槌按  
下虛空裂試將此意叩西來黃面瞿曇應  
捲舌

周程張朱叅究禪宗考

世之宗孔孟者諡諡訛訛以詆釋氏夫羽  
翼孔孟者濂洛諸儒稱爲入室弟子而由  
今考之則周程張朱有一不究心禪旨者  
乎濂溪初見黃龍禪師叩以教外別傳之  
旨龍諭之曰只消向你自家屋裡打點孔  
子謂朝聞道夕死可矣畢竟以何爲道夕  
死可耶顏子不改其樂所樂何事但於此



究竟久久自然有箇契合處嘗與張子厚同詣東林禪師論性語及理法界事法界至於理事交徹泠然獨會故太極圖說爲濂溪一生密諦而無極之真妙合而凝語語出自東林口訣橫渠嘗有言曰東林性理之論惟我茂叔能之陳忠肅公亦謂性理之學東林授之濂溪良不誣矣予嘗謂

周子端居靜坐屏棄文字風月無邊庭草交翠卽以爲學佛作家無負西來大意可也明道深味華嚴合論以其所得書於雲蓋寺一日歎曰我於天壤之間真自孤立伊川問道於靈源禪師指示法要至爲伯淳作狀則曰明道先生出入釋老幾希十年蓋程子嘗以太極圖授之后山先生后

山曰予觀周程推已教人及反觀孔孟以  
來實未嘗有此寂默危坐以爲斯文之窮  
究信乎周程體道之源固自有別流也至  
若晦菴從學李延年久之恨無所發明徧  
謁諸方長老咸指之爲禪學已與張南軒  
同叅大慧禪師頓有洗發嘗曰達磨盡翻  
窠臼倡爲禪宗視義學尤爲高妙又曰顧

盼指心性名言超有無夫此四子爲理學  
宗工而見性明心多方叅請左提右挈若  
出一人此竝見於語錄性學諸書班班可  
考可輕信其爲排佛乎濂溪復有言曰吾  
此妙心實啓迪於黃龍發明於佛印然易  
理廓達自非東林開遮拂拭無由表裡洞  
然若公者儻所謂發真歸源無忘本來者

歟末學小子於儒家言既未縱橫考索而  
如來宗旨且未一涉其涯輒乃哆口張皇  
妄肆毀擲此何異學語新鶯調舌花間而  
鳳嘯九天不自羞澀象馬牛羊各自成聲  
而師子震吼反以爲威音之未逮者乎儒  
以發揮性體而釋氏亦以獨標性宗學道  
者試以吾言合之周程而復以周程之所

得者還以歸於一靈之獨照則濂洛之和  
鳴卽是靈山一會儼然未散矣

四子各有小傳載法喜志中此篇另摭  
一番實錄不蹈一語

### 書彌陀觀音經後

彌陀誓願四十有八觀音誓願一十有二  
然觀音拔諸苦海開甘露門安在非彌陀  
極樂之邦彌陀出廣長舌相徧覆河沙能

令水鳥樹林皆演妙音安在非神通具足  
普門變現故嘗爲之說曰彌陀觀音法門  
無二得不退轉總歸真諦仁者見之謂之  
仁知者見之謂之知

書天童語錄後

予讀天童語錄幾歎句下蓋茫乎其未有  
入也已讀景德傳燈錄及禪宗正脉諸書

始覺有人頭處得叩一二機緣信乎宗門  
語貴在用到不在口說也方其行棊行喝  
是非非是然乎然不然乎不然或歿中求  
活偏中行正小中現大順中顯逆全機大  
用拈出便親覲面當風毫無蓋覆是在有  
以會之矣能會則如清涼池面面皆可入  
不會則如大火聚面面不可入如是則豈

獨天童公案目爲畫蛇卽世尊陞座文殊  
白槌吾猶以爲贅矣

天曇僧書寫華嚴經後

有僧天曇自補陀來結芙蓉菴於南郭書  
大方廣佛華嚴經其書結構有法濯濯如  
洗令觀者起清淨想起莊嚴想起自在不  
思議想蓋萬曆三十年正月起至三十二

年十月止寫經凡六十三卷人壽有盡一  
朝化去其徒幻如續寫成之共成八十一  
卷天曇名洪祥湖廣武昌人幻如名海瑚  
湖廣京山人二僧皆楚產昔衡嶽有楚雲  
上人書經貯梅檀匣錮藏三生殿皇祐間  
有貴人開之爾時疾雷破山煙雲莽互相  
捉不相見彌日不止幻如其善藏之恐夜

半霹靂神甲下來爲江上老龍持去也

書尊勝幢後

攜李沙門信公以尊勝陀羅尼呪刻爲寶幢以施善信此呪起於世尊慈憫拔善住於七趣文殊方便開波利以大乘功德流通有自來矣若夫廬山法照現金臺於鉢內徑山崇惠感神語於空中皆得此呪以

昭靈呪卽我 成祖文皇帝 御製敘文

宣揚此陀羅尼呪傳示海內載在永樂十年班班可考信一切如來灌頂之心印三藏靈文秘密之總持也樓閣經云佛言我於無量劫中修六度萬行未證菩提一聞尊勝卽成正覺況其下者乎

跋白衣經後

白衣呪在大藏中名隨心陀羅尼衆生有能堅持得不退轉者則一切祈求悉令滿足世人偏設之以爲祈嗣津梁蓋亦方便法門也始予刊行後見呪中字與藏經不無出入今一一釐正呪後又有經一段出首楞嚴理悟機圓用超言絕不知祖師位下何人拈出以附白衣經卷子往寓京師

見大內曾頒是經又見王臣貴戚之家禪衲往來凡誦白衣呪者以此經爲大慈悲父滿中河沙倚爲眷屬久欲表而出之以告來者適雲麓張君發大精進開施一藏不覺歡喜踴躍次第書之

跋金剛經後

金剛般若經世尊第四時所說衆生億萬

劫難逢遼左予公江東善士一門禮佛子  
類維摩之善思闔宅歸真女學道玄之靈  
照謂此甚深經典人所願樂欲聞三十二  
分行行稽首奉行五千百言字字刊行喜  
捨胎卵濕化度入無餘觸法聲香不住布  
施不應貪着是名受持

跋中峯祖燈錄後

趙文敏師事中峯住公旣爲寫照已復從  
中峯上浣衣鉢自威音演派摹像凡六十  
四尊威音止画一圓相表性宗也七佛而  
下遞傳而爲西竺之二十七祖東土之六  
祖南嶽讓馬祖而下凡十五葉爲大宗又  
八葉而至於住公爲小宗原原本本各極  
其趣夫法肇威音寢假而爲六十四尊譬



易有太極寔儼而爲六十四卦相摩相盪  
極於無窮天機之所至胡可易耶威音以  
前姑置勿論卽近談賢劫尚有千如來始  
及釋迦古佛應世不可勝紀蓋一妙圓中  
自有恒河沙數諸佛非復綠雨紅蕉所能  
潤色其萬一也華嚴有之曰諸菩薩如幻  
一切法如化佛出世如影誠哉是言

放紙炮戲書

我觀此炮紙與藥物相待而成非火不發  
非人不舉和合因緣非自然性一響之後  
煙銷影絕無常迅速有如是乎大塊之中  
吹萬不齊聲起聲滅亦復如是此炮幻有  
疾如電光以幻合者卽使歷劫終期於盡  
何異此炮唐人有詩云萬物自生聽太空

恒寂寥還從靜中起卻向靜中銷此韋蘇州語蓋老於禪者也

僧寶贊

一百二十首

予喜讀禪書不耐次第讀偶拈一段如佛轉輪汗漫而遊縱橫顛倒遂得贊一

百二十首

一行

皇皇國師學總人天下閱之曆子雲之玄水作西流天迴北斗師所縱橫乾坤在手

寶掌

王齒談經寒泉響急靈心未露階前鬼泣  
千秋一鉢歷盡支那道眼觀之何異旋波

玄朗

左溪尊者清散超然一鬱多羅越四十年  
洗鉢猿擎翻經鳥集刺史命駕邈不可卽

萬回

大千世界一毛端聚萬里歸來且莫可遇  
王帶雲袍出入禁庭宮女三千共說無生

端師子

神通妙用大千戲具見師子弄疾入三昧  
瀟湘釣客是耶非耶一聲漁父九品蓮華

栽松道者

破頭山中栽松自命水邊一諾童女輒孕

伊尹空桑提伽生火欲究三緣請問佛祖

香巖

密密堂堂本來透露擊竹山中霍然大悟  
遙望瀉山始信傳真一真何在枯木龍吟

寒山

樺皮爲冠天形道貌獨步國清望空長笑  
至人遯迹巖石爲開怪爾豈干饒舌何爲

嬾瓚

寥寥寂寂空山絕壁塊石枕頭乾坤猶窄  
撥牛糞火拾蹲鴟食天子下詔寒涕未拭

言法華

爲顛爲狂莽蕩不羈酒肆屠門褰裳以濡  
御榻跣趺目無天子顯化分身劫超無始

普聞

帝位匪踐乃學安禪巍巍普聞火裡青蓮  
神龍入袖風雷滿坐案山若移此法方墮

破竈墮

以杖擊竈竈卽解脫竈無新故見有起滅  
瓦礫談禪獲無漏通笑彼青衣唐突虛空

政黃牛

日跨黃犢嬾出巖谷國士筵中不一刺足

浮盆水上手掇瑤華清吟達旦心月同孤

棗栢

棗栢薦食食已書經口放寶光以代然燈  
一虎負裝二女行汲至人不動心空境寂

鳥窠

長松之顛化人所巢雲中說偈風清海濤  
我觀世間新新不住曾是一枝出離火聚

馬郎婦

金沙灘上提魚出賣豔色牽人朝榮夕敗  
黃金鎖骨始露靈源老婆心切特地呈權

船子

輕橈掉弄夾山點頭駕險凌空殺活自由  
覆船入水高風寂寂師亦有言藏身滅跡

丹霞

路逢靈照靈照不言雖則不言而法熾然  
大道默默離形絕相燒取木佛以破執象

紙衣

南嶽艾絮大梅荷葉紙衣紙衣矯矯孤拔  
人不奪境境不奪人人境雙忘玄要乃存

衣蒲童子

五臺山中奔雷掣電是蒼虬者白晝鬼現

我真文殊無是文殊寄語太尉勿動狂癡

南澗慧超

俳諧占角疑於散聖現病新林以衆生病  
談經殿上詔賜羊車一朝脫履清風穆如  
兜率悅

都運談禪箭落鋒機龍安路滑莫識階梯  
趯翻溺器猶涉滲漏巖頭一拶明星始透

曇鸞

海濤方怒師至湖迴神霄之上剎然天開  
胡然學仙乃師弘景幸遇留支一回喚醒

蜺子和尚

踏雪佯狂行歌自足涉江採蜺果然其腹  
卽此蜺子爲物俱具神前酒盤是西來意

扣冰

瀑光古佛冬扣寒氷謂氷匪寒無異陽春  
靈曜山前一朝應召人王法王普歸法照

杯度

帶索藍纓日倚蘆圖一蘆圖內現四禪天  
二十萬里靈期路捷取鉢雲中還我故物

曇無懺

兄殺王象爲王伏誅大義哭兄抗言丹墀

從王入山王渴須水枯石流泉令聞不已

靈芝

律師壇成老人獻珠寶光變現如吠琉璃  
童子月蓋光中萬狀師守壇心一歸無相

法聰

谷火熾然師入火定谷水淵然師入水定  
哮虎在右視若蜩蟬匪物能降我心則降



傅弘

王輦昇殿而公宴然法身無動以安大千  
定林之下天花散亂白石離離飼虎一飯

智廣

衆生有病維師利濟竹杖一擲病乃立愈  
巨蟒化石遊魚昇天魚我無親蟒我無冤

辛七師

至孝痛父哀毀發狂破窠端坐體露奇光  
如是七窠分身竝現白雲無根長空繞徧  
契此

形裁腴腹感頰蟠腹布囊行乞如意自足  
此布囊中百一供身禍福前知顯化長汀  
無畏

如憨如狂亦止亦定撲殺佛子驚我佛性

鉢水輕撩神龍下來娑竭談經水底天開

圓澤

瞿塘峽口天作之行錦備負汲拍拍神驚  
童子扣角煙橫縹緲欲話三生語不可了

道安

旦乞師經暮以經還闡經合道瑞相昭然  
蜉蝣季龍蟻蠓符堅是曰彌天惟釋道安

高沙彌

南嶽不來江陵不去彼坐戒者鬼家活計  
長安自鬧我國晏然草菴一卓氣息都捐  
不空三藏

一金剛杵八表降魔眼調狂象力遏天吳  
聖贊三朝爲法普濟英英國師詎以爵貴

彌陀和尚

羸形垢面食土茹木中道示人化行崖谷  
天子禮之遙拜南岡乃名其居般舟道場

布毛侍者

群芳虛幻開謝不停昭陽供奉忽悟無生  
衆請諸方猶屬假相拈起布毛神通無量

藥山

閨閣不除滲漏有餘離法自淨方爲丈夫

野鶴神情青天格調月下孤峯披雲獨嘯

打地和尚

學徒致問以棒打地取柴擲釜默承師意  
真風度籥靈機發樞桃李不言下自成蹊

亮座主

將心講經駢拇枝指虛空講經回頭卽是  
馬師發藥渙矣氷消一坐西山寂寂寥寥

黃檗

大雄山下虎勢咆哮活眼生機百丈親遭  
神珠在額首標心要如大日輪行空普照

達磨

對面不識神機廓然一花開後遄返西天  
腓肉骨髓各自認取如雷動地螫者皆起

僧璨

鼻性本空了絕攀緣不內不外不在中間  
或過屠門或入酒肆我自調心何關汝事

法達

諸佛知見卽汝自性有念成邪無念卽正  
有無拋卻妙轉蓮華不勞門外更覓三車

南嶽

磨甑非鏡坐禪非佛無住法中說非非法

師言一啓如飲醍醐三昧花開雨澤滂沱  
馬祖

龍駒躍天蹴踏四海八十四人分流演派  
何人一口吸盡西江有老居士展化襄陽

鹽官

淨瓶古佛空中打勢清淨法身徧滿天地  
扇子已破尚索犀牛團團桂魄影動千秋

百丈

導師一喝三日耳聾百丈風高普振玄宗  
掃去葛藤神鋒透露下一轉語野狐得度

南泉

兩堂分辨是非淆亂利劍斬猫當空截斷  
擲錫淮西元濟解兵金剛窟內玉立亭亭

長沙

百尺竿頭進步有餘朗水澧山縱意所如  
徧乾坤內分明法法萬象虛空自問自答

趙州

楊花栢子頭頭是道丈六金身只一莖草  
坐禮元帥不下禪牀勘破臺山一樣風光

龍山和尚

道人行徑溪流菜葉雲水既空人天不涉

青山鶴骨遊行自在欲叩真源泥牛入海

法常

大梅山中梅子熟未欲對龐翁無下口處  
親者不問問者不親寄語夾山勿自迷真

道琳

女人生染終身隔面問疾來臨遙止不見  
靈裕精嚴不授毘尼矯矯高風兩雄並驅

高峯

龍鬚九年縛草爲龕晚居天目一室如船  
三十年來坐斷死關下視千巖中峯皎然  
俱胝

一指頭禪靚面相看拳曜當空爍破大千  
不用商量語言都喪三十年來只此伎倆  
道丕

負母入山乞食供母穀價騰湧辟穀自苦  
痛父戰沒滴血尋骸髑髏躍出名馳九垓  
道明

逐大庾嶺躡黃梅法徧體汗流本來親切  
密語密意不在傳衣如人飲水冷暖自知  
忠國師

天啓心印不受師傳叱倒三藏喝退南泉

琉璃殿上相看不識自匪耽源疇宏法席  
惟寬

有汝有我展轉不見無汝無我阿誰求見  
不倚兩頭不落中間是故師云道在眼前  
凌行婆

伎歿禪和如麻似粟笑殺浮杯未諳一哭  
趙州眼光爍破四天不遇當機幾喪目前

瀉山

撥鑪試火智宗是托司馬藻鑑爰諮爰度  
踢倒淨瓶華林弗居天作高山寶繁有徒  
石霜

瀏陽古佛一見便識了得西來空中片石  
影斷霜華越二十年枯木堂中響徹鈞天

子湖



鐵磨兩轉勝光一蹋活捉生擒爪牙法窟  
下堂喝賊上堂犬吠自在娛嬉百千三昧

甘贄

南泉設粥與衆說法狸奴白牯說波羅蜜  
藥山行化百兩是將福德如是不可思量

祇林

手揮木劍掃絕魔窻後十二年置劍無言

雖則無言龍光射斗文殊汗下普賢卻走

智通

夜半虛堂發狂大叫笑指歸宗寓言合竅  
戴着笠子風行電走身倚北辰手攀南斗

石頭

問爾解脫曰誰縛汝問爾淨土曰誰垢汝  
問爾涅槃誰生歿汝衆角雖多一麟足矣

雲巖

師子神通一六互用許大乾坤閒情調弄  
埽地當空圓滿現前是第幾月大眾同參

三平

開襟受射當機躍然箭鋒之下領取生緣  
先以定動後以智拔不遇潮州穿楊不發

投子

一般漆桶千般變現是賣油翁實擔板漢  
傾翻惡水性海澄澄舌端雨下普潤群生

法慶

北地牧牛講僧識面展化東京奔雷掣電  
鐵牛踔跳倏過新羅撞破虛空定力居多

洞山

無情說法有情不知過水覩影忽契如如

一水影中三身竝到本來面目不行鳥道

夾山

竿頭指點船子投機一回入水打動天倪  
本色住山公能自狀鳥落巖前猿歸青嶂

巖頭

是凡是聖喝下承當跨門一問箭下遼陽  
點破虛空意超色象如擊毒鼓聞者皆喪

雪峯

三登投子九上洞山朗州叅徧始透禪關  
象骨巖前歿蛇當路驀地揭來生龍活虎

一  
九峯

坐脫立亡外道小兒衲僧巴鼻不在先知  
一巨晴空千波競起文殊普賢汝得其髓

雲居

緣覺聲聞非師所安三峯之下乃焚其菴  
縛樹而居海昏絕境玄棧宏開影堂標勝

曹山

寶鏡重重洞上傳宗敲唱竝舉五位旁通  
南州卻召清真自守一滴靡沾誰云顛酒

玄沙

是備頭陀南臺釣徒飛猿嶺上蹶足回車

埽空文字不落捲禳堰溪水聲是汝入處

佛日

一條拄杖何處得來旣匪須彌亦非天台  
不自我得不從人有擲下成龍山河倒走

法眼

二僧捲簾一子一奪明暗相叅中藏殺活  
牡丹賦就感動君王風傾九土法海清涼

投子青

俊鷹見夢圓鑑傳衣羊廣山頭別樹靈基  
楮衾爲蓋冰枯雪老塔示再來光浮瑪瑙

佛印

藻思若抽清言若灑妙高臺上翻經賸彩  
磨衲殊珍頒之尚方奕奕坡翁玉帶詒裝

悟新

黃龍會下聞聲悟旨無量劫來偷心盡歎  
聖凡路絕乃見真心天降時雨山川出雲

道隆

偉哉隆公兆起龍蟠禁林待問秘閣談禪  
帝寵弗居舉璉自代謾謾清風急流勇退

神鼎

不居淺壑不住高峯碎餅開堂肇啓靈蹤

三生藏內誰歟識取匹馬馱來湘陰男子

紹銑

維師威靈有赫戎兵化被湘南梅山以平  
鐵石爲腸金剛爲眼闍維不壞法城斯顯

惠安

百二十年委運自度生如着衫效同脫袴  
棄之尸陀野火自焚大圓鏡裡一任翻身

惟政

團團海蛤現菩薩相一回說法皇情以暢  
太乙終南削迹自娛會昌之禍師乃前知

曉了

言莫可窮響莫可傳離言絕響分別熾然  
遍擔山色曹溪雲遶至今空谷猶傳曉了

曇藏

巨蟒伏戶神犬銜衣至人游息百靈所司  
彼以毒來我以慈受蟒亦尋聲無邊疾走

金牛

一飯供僧名傳衆口溪水州茶各臻妙有  
堂前作舞而樂陶陶點瑟昭琴此境誰描

神讚

百丈叅來了知歇處事事圓成放光動地

古靈遷化官止神行洪鐘一叩三昧無聲

普化

掣風掣顛非俗非玄驢鳴一下鳳嘯九天  
振鐸入棺不留鞭影大地全收風清月冷

仰山

得坐披衣向後自看若箇機緣瀉山方便  
方便云何黃葉止啼撲破鏡來始證真如

王梵志

黎陽樹上一癩斗大怪爾梵天於茲托化  
如樹生耳如柳生肘化入寥天曷無曷有  
無言和尚

維師一鉢其猶橐籥望氣升沈雨暘時若  
靈言玉瀉天風海濤神龍下來桀桀驕驕  
風穴

鐵牛之機語入離微濟北宗風維師獨持  
克塞大千妙含幽致一片青山鑿頭邊意  
首山

動揚古路不墮悄然始終賓主的的當前  
欲叩綱宗妙旨莫識打破鳳林單刀直入  
善昭

沔襄八請以手擲揄龍德三召堅卧自如



蒙頭宴處三十其臘是宜天人向爾乞法

寶積

向上一路千聖莫傳忽遇屠家點下精言  
精言一啓掀翻寶藏心月孤懸光吞萬象

德山

一毛吞海纖芥投鋒師於同學以此傳宗  
卽此心宗亦屬剩語惟餘棒喝如雷如雨

龍牙

禪板新闢一般消息處處相逢銀山鐵壁  
師之妙用解若未解透出西來神龍戲海

踈山

造化小兒諸方遊戲木蛇一握是曹家女  
迢然迢然何處控搏碧空之外雲水俱閒

幼璋

始謁騰騰再謁憨憨兩師記前各授精言  
遺骸數千一人收瘞時人語曰增悲大士

慧忠

貶禪爲俗卽俗而禪一段清機雪柱氷天  
師有三偈靈言的鑠皦皦龜洋雞群野鶴

從諫

溫泉岡上寂寂跏趺對食者誰曰賓頭盧

龍華旣入永截愛網笑彼癡兒猶問向往

元曉

心滅法滅心生法生一罽醴水而分愛憎  
憎愛兩忘方可悟道白骨起舞空山欲笑

